

***(Birgalikda qarz oluvchi shaxs ishtirok etmagan holatlar bo'yicha oferta namunasi)***

**JISMONIY SHAXSLARGA MIKROQARZ AJRATISH BO'YICHA OMMAVIY OFERTA**

Mazkur Oferta AT "Aloqabank" (bundan buyon matnda "Bank" deb yuritiladi) tomonidan jismoniy shaxslar bilan mikroqarz shartnomasini (bundan buyon matnda "Shartnoma" deb yuritiladi) tuzish bo'yicha rasmiy taklifi hisoblanadi.

Jismoniy shaxs (bundan buyon matnda "Qarz oluvchi" deb yuritiladi) Oferta shartlari bilan tanishib to'liq va e'tirozsiz aksept qilganidan so'ng Shartnoma tuzilgan deb hisoblanadi.

Bank tomonidan Qarz oluvchiga yuborilgan SMS-xabarda ko'rsatilgan kodni ofertani tasdiqlash uchun kiritishi orqali yoki Bank tomonidan taklif qilingan boshqa usul orqali tasdiqlashi mazkur ofertani qabul qilish va akseptlash deb baholanadi.

**I. ATAMALAR**

1.1. Mazkur ofertada quyidagi tushunchalardan foydalaniladi:

**Mikroqarz** – Bank tomonidan qaytarishlik, to'lovlilik, muddatlilik, ta'minlanganlik va kredit mahsulotining asosiy shartlarida belgilangan hollarda maqsadlilik tamoyillari asosida, milliy valyutada, jismoniy shaxslarga (qarz oluvchilarga), mazkur ofertada nazarda tutilgan hamda Mikroqarzning individual shartlarida belgilangan shartlar asosida Bank tomonidan qarz oluvchiga taqdim etiladigan ma'lum miqdordagi pul mablag'lari.

**Qarz oluvchi** – Mikroqarzdin foydalanish istagida bo'lgan, Mikroqarz rasmiylashtirish uchun Bankka ariza taqdim etgan va mazkur oferta asosida mikroqarz rasmiylashtiruvchi jismoniy shaxs.

**Mikroqarz ofertasi** – Bank tomonidan tasdiqlangan va keng ommaga e'lon qilingan, unda ko'rsatilgan shartlar asosida mikroqarz ajratish bo'yicha taklif;

**Mikroqarzning individual shartlari** – Qarz oluvchi tomonidan Mikroqarz olishda aks ettiriladigan va tasdiqlangan Bank tomonidan Qarz oluvchi uchun hisoblab chiqilgan ehtimoliy moliyalash summasi doirasida Mijozga mikroqarz taqdim qilishning muayyan shartlari (summasi, muddati, foiz stavkasi va h.k.). Mikroqarzning individual shartlari har bir Qarz oluvchi uchun mazkur Mikroqarz ofertasining **1-ilovasida** keltirilgan shaklda tasdiqlanadi.

**Ariza** – Qarz oluvchiga Mikroqarz ajratish ehtimolini baholash maqsadida Qarz oluvchi tomonidan (potensial qarz oluvchi tomonidan) Mikroqarz ajratishni so'rab Bankka yuboriladigan (taqdim etiladigan) va Mikroqarz muddati, miqdori va boshqa muhim shartlari ko'rsatilgan, Mikroqarz to'g'risida umumiy axborotni o'z ichiga olgan hujjat.

**Bank kartasi** – tovarlar (ishlar, xizmatlar) uchun to'lovlarni amalga oshirishda bank karta hisobvarag'idagi mablag'lar doirasida tegishli operatsiyalarni amalga oshirish va/yoki naqd pul mablag'larini olish huquqini beruvchi bank debet kartasi.

**Aksept** – Qarz oluvchining roziligini bildirishga, Mikroqarz olish uchun Bank tomonidan taklif qilingan shartlarni qabul qilishga yo'naltirilgan harakatlari.

**Mikroqarzning to'liq qiymati** – Mikroqarz olish bilan bog'liq to'lovlarning haqqoniy, yillik va samarali hisoblashdagi foiz stavkasi.

## II. SHARTNOMA PREDMETI

2.1. Bank Qarz oluvchiga ushbu Shartnoma shartlarida ko'zda tutilgan shartlarda qarz ajratish majburiyatini, Qarz oluvchi esa ajratilgan mikroqarz va unga hisoblangan foiz summalarini Shartnomaning **2-ilovasi** bo'lgan Qarzni qaytarish jadvalida (bundan buyon matnda "**Jadval**" deb yuritiladi) ko'zda tutilgan muddatlarda qaytarish majburiyatini o'z zimmlariga oladi.

## III. UMUMIY QOIDALAR

3.1. Mikroqarz Qarz oluvchining skoring tahlili natijasidan kelib chiqqan holda lekin Bank tomonidan belgilangan mikroqarzning maksimal miqdoridan oshmagan miqdorda ajratiladi.

3.2. Mikroqarz Qarz oluvchining Mikroqarz olish uchun ariza taqdim qilish jarayonida ko'rsatilgan tegishli bank kartasiga o'tkazib beriladi yoki Qarz oluvchi tomonidan taqdim qilingan oldi-sotdi (ish, xizmat ko'rsatish) shartnomasiga asosan yetkazib beruvchi (ish, xizmat ko'rsatuvchi) tashkilotning hisobvarag'iga o'tkazib beriladi va shu kundan boshlab Mikroqarz ajratilgan deb tan olinadi.

3.3. Mikroqarz bo'yicha foizlar Mikroqarz ajratilgan kundan boshlab Mikroqarznig asosiy qarzni to'liq qaytarilgan kunigacha uning qoldiq summasiga nisbatan kunlik hisoblab boriladi. Foizlar yiliga 365 kunlik asosda hisoblanadi.

3.4. Mikroqarznig to'liq qiymati O'zbekiston Respublikasi Adliya vazirligida 2018-yil 2-iyulda 3030-son bilan ro'yxatga olingan "Bank xizmatlari iste'molchilari bilan o'zaro munosabatlarni amalga oshirishda tijorat banklarining faoliyatiga qo'yiladigan minimal talablar to'g'risida"gi Nizomning **1-ilovasi**ga asosan hisoblanadi va Mikroqarznig individual shartlarida batafsil aks ettiriladi.

3.5. Shartnoma bo'yicha Qarz oluvchi quyidagilarga roziligini bildiradi:

- Mikroqarz olish uchun ariza Qarz oluvchi tomonidan yuborilganligi faktini tasdiqlash uchun, Qarz oluvchi uning shaxsiga doir ma'lumotlarga ishlov berishga hamda Qarz oluvchi nomiga uchinchi shaxslar tomonidan mikroqarz rasmiylashtirishni oldini olish maqsadida shaxsga doir ma'lumotlari olinishiga;

- aloqa vositalaridan foydalangan holda sms/elektron pochta/audio eshittirish/pochta jo'natish, axborot-kommunikatsiya xizmatlari orqali pochta jo'natmalarini va bildirishnomalarni jo'natishga;

- Davlat personallashtirish markazidan olingan shaxsga doir ma'lumotlarini qayta ishlashga hamda kredit byurolari, soliq organlari, uy-joy kommunal xizmatlari, uyali aloqa operatorlari, protsessing markazlari (Uzcard, Humo va boshqalar) tijorat banklari va boshqa tashqi manbalardan shaxsga doir ma'lumotlardan foydalangan holda ma'lumotlarni olishga;

- To'lovlar o'z vaqtida amalga oshirilmaganda Bank tomonidan muddati o'tgan qarzдорlikni qoplash uchun zaruriy summalar avtomatik hisobdan chiqarish xizmati orqali yechib olinganda Bankning amaldagi Tarifida nazarda tutilgan miqdorda xizmat haqi undirilishiga.

3.6. Shartnoma bo'yicha Qarz oluvchiga ko'rsatilgan va/yoki ko'rsatilayotgan barcha bank xizmatlari uchun Qarz oluvchi amaldagi Bank Tarifida nazarda tutilgan bank xizmat haqini Bankga to'laydi.

3.7. Yangi tahrirdagi tariflarni Bankning rasmiy veb sayti ([www.aloqabank.uz](http://www.aloqabank.uz))da e'lon qilinishi, Qarz oluvchini bu haqda xabardor qilingan deb hisoblash uchun yetarli bo'ladi va uning shartlari Shartnoma Taraflari uchun majburiy hisoblanadi.

3.8. Bank O'zbekiston Respublikasining "Jinoiy faoliyatdan olingan daromadlarni legallashtirishga, terrorizmni moliyalashtirishga va ommaviy qirg'in qurolini tarqatishni moliyalashtirishga qarshi kurashish to'g'risida"gi Qonuni va boshqa qonun hujjatlariga muvofiq, oldindan ogohlantirmasdan Qarz oluvchining barcha operatsiyalarini to'xtatib turishi, pul mablag'larini yoki boshqa mol-mulklarini ishga solmay to'xtatib qo'yishi mumkin.

3.9. O'zbekiston Respublikasi Adliya vazirligida 2025-yil 22-aprelda 3618-son bilan ro'yxatdan olingan "Banklarga o'rnatiladigan makroprudensial normativlar hamda ular tomonidan beriladigan kreditlar (mikroqarzlarni) bo'yicha to'lovlarning eng yuqori qiymatlariga doir talablar to'g'risida" Nizom talablariga asosan Qarz oluvchining qarz yuki ko'rsatkichini hisoblash va kredit ajratish o'rtasidagi vaqt oralig'i 3 (uch) ish kunidan oshgan taqdirda Bank tomonidan Qarz oluvchining qarz yuki ko'rsatkichi qayta hisoblanadi.

3.10. Qarz oluvchining qarz yuki ko'rsatkichi qayta hisoblanganda qarz yuki ko'rsatkichi belgilangan me'yor talablaridan oshganligi aniqlangan taqdirda qarz yuki ko'rsatkichi belgilangan me'yor talablari doirasiga tushgunga qadar Bank tomonidan Qarz oluvchiga kredit ajratish vaqtinchalik to'xtatib turilishi yoki kredit summasi kamaytirilishi yoki Shartnoma bir tomonlama bekor qilinishi mumkin.

#### **IV. MIKROQARZNI QAYTARISH TARTIBI**

4.1. Mikroqarz va unga hisoblangan foizlarni qaytarish Shartnomaning ajralmas qismi hisoblangan to'lov jadvali (2-ilova)ga asosan har oy Mikroqarzning individual shartlarida ko'rsatilgan qaytarish usulida (differensial/annuitet), mikroqarzdand foydalangan oyning keyingi oyidan boshlab amalga oshiriladi.

4.2. Mikroqarzning har oydagi to'lov sanasi haftaning shanba va yakshanba kunlariga, shuningdek dam olish kuni deb e'lon qilingan bayram kunlariga to'g'ri kelganda to'lov sanasi keyingi ish kuniga ko'chiriladi.

4.3. Mikroqarzning oxirgi to'lov sanasi (oxirgi muddati) haftaning shanba va yakshanba kunlariga, shuningdek dam olish kuni deb e'lon qilingan bayram kunlariga to'g'ri kelganda oxirgi to'lov sanasi oldingi ish kuniga ko'chiriladi.

4.4. Mikroqarz bo'yicha qarzдорlikni muddatidan avval qaytarilishiga ruxsat etiladi. Mikroqarzni muddatidan avval qaytarilganligi uchun qo'shimcha to'lovlar undirilmaydi.

4.5. Mikroqarz va unga hisoblangan foizlar bo'yicha qarzдорlikni qaytarish Qarz oluvchining ish haqi, boshqa daromadlari va tushumlaridan mablag'larni o'tkazish orqali, naqd pul kirim qilish orqali, bank kartalaridan mablag'larni o'tkazish orqali, Qarz oluvchining Mikroqarz bo'yicha Bankdagi tranzit hisobvarag'iga o'tkazib berish orqali,

avtomatik tarzda bank kartalaridan yechish yo'li orqali hamda infokiosklar, mobil ilovalar yoki boshqa elektron to'lov tizimlari yordamida to'lov qilish orqali amalga oshiriladi.

4.6. Mikroqarz bo'yicha qarzdorlikni qaytarish uchun amalga oshirilgan to'lov summasi Mikroqarz bo'yicha majburiyatlarni bajarish uchun yetarli bo'lmasa, kelib tushgan mablag' quyidagi keltirilgan ketma-ketlikda qarzdorlik summasini qoplash uchun yo'naltiriladi:

- birinchi navbatda – asosiy qarz bo'yicha muddati o'tgan qarzdorlik va muddati o'tgan foiz to'lovlari mutanosib ravishda;

- ikkinchi navbatda – joriy davr uchun hisoblangan foizlar va joriy davr uchun asosiy qarz bo'yicha qarzdorlik;

- uchinchi navbatda – Bankning qarzdorlikni uzish bilan bog'liq bo'lgan boshqa xarajatlari.

4.7. Mikroqarz to'lovi uchun Jadvalda belgilangan sanadan oldin yoki Mikroqarz bo'yicha muddati o'tgan qarzdorlik summasidan ortiqcha mablag' kelib tushsa, birinchi navbatda muddatli asosiy qarzdorlikdan tashqari barcha qarzdorliklar (muddati o'tgan asosiy qarz, muddati o'tgan foiz, Bankning qarzdorlikni uzish bilan bog'liq bo'lgan boshqa xarajatlari, joriy davr uchun hisoblangan foizlar, joriy davr uchun asosiy qarz) so'ndiriladi, undan so'ng ortib qolgan mablag'dan nabatdagi to'lov sanasiga qadar hisoblanishi kutilayotgan foiz summasiga teng mablag'ni ushlab qolgan holda ortiqcha qismi Mikroqarzning asosiy qarzini so'ndirishga yo'naltiriladi.

4.8. Qarz oluvchidan Mikroqarzning to'lovi uchun Mikroqarzni qaytarish jadvalida belgilangan summaga nisbatan ko'p mablag' kelib tushsa va kelib tushgan mablag'ning ortiqcha qismini Mikroqarzning asosiy qarzini so'ndirishga yo'naltirilganda Mikroqarzni qaytarish jadvali qayta rasmiylashtirilmaydi.

4.9. Qarz oluvchi tomonidan Mikroqarz va unga hisoblangan foizlar o'z vaqtida qaytarilmaganda Bank Mikroqarz va u bo'yicha hisoblangan foizlarni qonun hujjatlarida belgilangan tartibda qaytarish choralarini ko'radi.

## **V. TARAFLARNING HUQUQ VA MAJBURIYATLARI**

### **5.1. Bankning majburiyatlari:**

5.1.1. Shartnomada belgilangan shartlar va miqdor doirasida Qarz oluvchiga pul mablag'larini uning bank kartasiga yoki Qarz oluvchi tomonidan taqdim qiliandigan oldi-sotdi (ish, xizmat ko'rsatish) shartnomasiga asosan yetkazib beruvchi (ish, xizmatni ko'rsatuvchi) tashkilotning hisobvarag'iga o'tkazish orqali berish;

5.1.2. Qarz oluvchiga kredit hisobvarag'ini ochish;

5.1.3. Mikroqarzni berishdan butunlay yoki qisman bosh tortgan taqdirda, ushbu Mikroqarz bo'yicha mablag'lar berishni to'xtatib qo'yish to'g'risida qaror qabul qilingan sanadan boshlab keyingi ish kunidan kechiktirmasdan Qarz oluvchiga Mikroqarz berish to'xtatilganligi va uning sabablari yuzasidan Shartnomada ko'rsatilgan aloqa kanallaridan foydalangan holda xabarnoma yuborish;

5.1.4. Mikroqarz muddatidan oldin undiriladigan hollarda bu to'g'risida Qarz oluvchini Shartnomada ko'rsatilgan aloqa kanallaridan foydalangan holda xabardor qilish;

5.1.5. Bank tomonidan Mikroqarz bo'yicha muddati o'tgan qarzdorliklarni so'ndirish uchun Qarz oluvchining bank hisobvaragi va (yoki) omonatidan (shu jumladan, bank kartalaridan) mablag'lar Qarz oluvchining topshirig'isiz hisobdan chiqarilganda, ushbu mablag' hisobdan chiqarilgan sanadan boshlab keyingi ish kunidan kechiktirmagan holda Qarz oluvchiga uning hisobvarag'idan qancha miqdordagi mablag' qanday sabablarga asosan va kimning foydasiga chiqarilganligini ko'rsatgan holda Shartnomada ko'rsatilgan aloqa kanallari orqali xabarnoma (ma'lumotnoma) yuborish.

## 5.2. **Bankning huquqlari:**

5.2.1. Qarz oluvchi tomonidan Mikroqarz bo'yicha o'z majburiyatlarini bajarilishi to'g'risida ma'lumotlarni Kredit byurolari va Kredit ma'lumotlarining davlat reestriga taqdim etish;

5.2.2. Mikroqarz bo'yicha to'lovlar haqida Qarz oluvchiga xabar berish uchun Shartnomada ko'rsatilgan aloqa kanallaridan foydalanish;

5.2.3. Shartnoma tuzilgandan keyin Qarz oluvchi to'lovga layoqatsiz deb topilganda, Mikroqarzni ta'minlash bo'yicha o'z majburiyatlarini bajarmaganda yoki Mikroqarzni rasmiylashtirish jarayonida taqdim etilgan ma'lumotlarning haqqoniy emasligi aniqlanganda, Mikroqarzni berishdan butunlay yoki qisman bosh tortish;

5.2.4. Qarz oluvchi Shartnoma tuzilgan kundan boshlab 30 (o'ttiz) kalendar kun davomida Mikroqarzdin umuman foydalanmasa Qarz oluvchining Mikroqarzni o'tkazish to'g'risida arizasini bajarmaslik;

5.2.5. Mikroqarz qismlarga bo'lib bosqichma-bosqich ajratilgan hollarda Qarz oluvchi Mikroqarzdin 180 (bir yuz sakson) kun ichida to'liq foydalanmasa Mikroqarzning foydalanilmay qolgan qismini ajratishni rad qilish;

5.2.6. Qarz oluvchining qarz yukini ko'rsatkichini hisoblash va Mikroqarz ajratish o'rtasidagi vaqt oraligi 3 (uch) ish kunidan oshgan taqdirda Qarz oluvchi va Birgalikda qarz oluvchining qarz yuki ko'rsatkichini qayta hisoblash;

5.2.7. Qarz oluvchining qarz yuki ko'rsatkichi qayta hisoblanganda qarz yuki ko'rsatkichi belgilangan me'yor talablaridan oshgan taqdirda Mikroqarz ajratishni vaqtinchalik to'xtatib turish;

5.2.8. Qarz oluvchining qarz yuki ko'rsatkichi qayta hisoblanganda qarz yuki ko'rsatkichi belgilangan me'yor talablaridan oshgan taqdirda Mikroqarz summasini kamaytirish;

5.2.9. Qarz oluvchining qarz yuki ko'rsatkichi qayta hisoblanganda qarz yuki ko'rsatkichi belgilangan me'yor talablaridan oshgan taqdirda Shartnomani bir tomonlama bekor qilish;

5.2.10. Qarz oluvchidan mikroqarzning asosiy qarz qismi bo'yicha muddati o'tgan majburiyatlar yuzaga kelganda Mikroqarzning individual shartlarida (**1-ilova**) ko'rsatilgan oshirilgan foiz undirish;

5.2.11. Quyidagi holatlarda Qarz oluvchidan Mikroqarzni (shu jumladan, hisoblangan foizlarni) muddatidan oldin qaytarishni talab qilish, undirib olish:

5.2.11.1. Qarz oluvchi tomonidan Shartnoma bo'yicha o'z zimmasiga olgan majburiyatlar bajarilmaganda va/yoki lozim darajada bajarilmaganda;

5.2.11.2. Ajratilgan Mikroqarz turli sabablarga ko'ra ta'minotsiz bo'lib qolganda;

5.2.11.3. Qarz oluvchi tomonidan yolg'on ma'lumotlar yoki qalbaki hujjatlar taqdim etilganda;

5.2.11.4. Qarz oluvchiga har qanday shaklda jinoyat ishlari yoki fuqarolik ishlari bo'yicha Qarz oluvchining to'lov qobiliyatiga ta'sir qilishi mumkin bo'lgan da'volar qo'zg'atilgan bo'lsa;

5.2.11.5. Bankda ushbu Shartnoma bo'yicha olingan mablag'lardan foydalanish, tasarruf etishda firibgarlik holatlari bilan bog'liq shubhalar mavjud bo'lganda;

5.2.11.6. O'zbekiston Respublikasining amaldagi qonunchiligida nazarda tutilgan boshqa hollarda.

5.2.12. Qarz oluvchining Bankda hamda boshqa banklarda ochilgan har qanday hisobvaraqlaridan, shu jumladan, bank kartalaridan Mikroqarz bo'yicha talablarni qondirish uchun zarur bo'lgan mablag'larni va barcha hisoblangan neustoykalarni akseptsiz tartibda hisobdan chiqarish (yechib olish);

5.2.13. Qarz oluvchi tomonidan to'lovlar o'z vaqtida amalga oshirilmaganda muddati o'tgan qarzdorlikni qoplash uchun zaruriy summalar avtomatik hisobdan chiqarish xizmati orqali yechib olinganda Bankning amaldagi Tarifida nazarda tutilgan miqdorda xizmat haqi undirish;

5.2.14. Shartnoma bo'yicha hamma summalarni Qarz oluvchining barcha mulklari (mulkiy huquqlari), elektron pullari va ta'minotlar hisobidan undirib olish;

5.2.15. Qarz oluvchining yashash joyida va doimiy ro'yxatdan o'tgan joyida Mikroqarzni maqsadli ishlatilishi (Mikroqarz mablag'i maqsadli ishlatilishi nazarda tutilgan hollarda) hamda garov mulki holatini o'rganish yuzasidan tekshirishlarni amalga oshirish;

5.2.16. Qarz oluvchi tomonidan taqdim etilgan ma'lumotlarni tekshirish yoki qo'shimcha identifikatsiya (shaxsni tekshirish) jarayonini amalga oshirish uchun Shartnomada ko'rsatilgan aloqa kanallari orqali Qarz oluvchi bilan bog'lanish;

5.2.17. Qarz oluvchining to'lov qobiliyatini baholash jarayonida O'zbekiston Respublikasi qonunchiligiga zid bo'lmagan Qarz oluvchi to'g'risidagi har qanday ma'lumotlarni olish va ulardan foydalanish;

5.2.18. Qarz oluvchi bilan telefon raqamlari, ijtimoiy tarmoqlardagi akkauntlari orqali bog'lanish va ularni yozib olish, Qarz oluvchining Bankka ma'lum bo'lgan manzillariga (rekvizitlariga) ushbu Shartnoma bo'yicha Qarz oluvchining majburiyatlarini bajarish to'g'risida xatlar, elektron pochta xabarlar va SMS-xabarlar yuborish;

5.2.19. O'z hisobidan, Qarz oluvchini xabardor qilmasdan, Mikroqarzni qaytarilmasligi xavfini sug'urta qilish;

5.2.20. Qarz oluvchi Shartnoma bo'yicha majburiyatlarini bajarmaganda taqdim qilingan sug'urta polisi bo'yicha Mikroqarz qisman yoki to'liq qoplab berilganda, sug'urta to'voni to'langan to'lov miqdori doirasida Shartnoma bo'yicha regress talab huquqini bir tomonlama Sug'urta qiluvchiga o'tkazish (subrogatsiya);

5.2.21. Bank Qarz oluvchi yoki uning operatsiyasi sanksiya ta'sir doirasiga tushganda yoki tushish xavfi mavjud bo'lganda, operatsiya miqdorini chegaralash, operatsiyani cheklash (rad etish).

### 5.3. Qarz oluvchining majburiyatlari:

5.3.1. Mikroqarz va u bo'yicha hisoblangan foizlarni to'lov jadvaliga asosan o'z vaqtida to'lash;

5.3.2. Olingan Mikroqarzni, Mikroqarzdin foydalanganlik uchun hisoblangan foizlarni va boshqa to'lovlarni mazkur Shartnoma shartlariga muvofiq muddatidan oldin to'lash to'g'risidagi Bankning so'rovini olgandan keyin 3 (uch) ish kuni ichida to'lab berish;

5.3.3. Familiyasi yoki ismi, telefon raqami, ro'yxatdan o'tgan manzili, yashash joyi, passport yoki ID karta ma'lumotlari o'zgarganda va Shartnoma bo'yicha majburiyatlarning bajarilishiga ta'sir qiladigan boshqa holatlar haqida 3 (uch) ish kuni ichida Shartnomada belgilangan aloqa kanallari orqali yoki Bankning xizmatlar ko'rsatish markazlariga borgan holda Bankka xabar berish;

5.3.4. O'ziga nisbatan huquqni muhofaza qilish organlari, nazorat qiluvchi organlar yoxud sudlar tomonidan qo'llanilgan yoki qo'llanilayotgan huquqiy ta'sir choralari, iqtisodiy, moliyaviy jarimalar va iqtisodiy, moliyaviy sanksiyalar to'g'risida unga ma'lum bo'lgan kundan boshlab Bankka 2 (ikki) ish kuni ichida xabar berish;

5.3.5. O'zbekiston Respublikasi hududidan tashqariga doimiy yashash uchun chiqib ketayotgan holda Mikroqarzni asosiy qarzi va unga hisoblangan foizlarni muddatidan avval qaytarish;

5.3.6. Bank xodimlariga garov mulki holatini o'rganish bo'yicha monitoring o'tkazilishida sharoit yaratib berish;

5.3.7. Tijorat banklarida ochilgan barcha bank hisobvaraqlaridan Shartnoma bo'yicha to'lov majburiyatlarini amalga oshirish uchun zarur summani akseptsiz hisobdan chiqarish to'g'risida haqiqiy, chaqirib olinmaydigan va so'zsiz talab qo'yish huquqini Bankka taqdim etish;

5.3.8. To'lovlar o'z vaqtida amalga oshirilmaganda Bank tomonidan muddati o'tgan qarzdorlikni qoplash uchun zaruriy summalar avtomatik hisobdan chiqarish xizmati orqali Bank tomonidan yechib olinganda Bankning amaldagi Tarifida nazarda tutilgan miqdorda xizmat haqi to'lash;

#### **5.4. Qarz oluvchining huquqlari:**

5.4.1. Shartnomada ko'rsatilgan shartlarda Mikroqarz berilishini talab qilish;

5.4.2. Shartnoma tuzilgan vaqtdan boshlab pul mablag'lari bank kartasiga tushgunga qadar yoki Mikroqarz mablag'i tovarlarni (ish, xizmatlarni) yetkazib beruvchi tashkilotning hisobvarag'iga o'tkazib berilgunga qadar Mikroqarzni olishdan bepul voz kechish;

5.4.3. Mikroqarzni istalgan vaqtda muddatidan oldin jarima sanksiyalarisiz so'ndirish;

5.4.4. Mikroqarz bo'yicha asosiy qarzi va unga hisoblangan foizlarni Bankka to'liq qaytarilgan holda ushbu Shartnomani muddatidan avval bekor qilish.

## **VI. QARZNI TAN OLIISH VA BAHSSIZLIK**

6.1. Qarz oluvchi mazkur Shartnoma bo'yicha olingan Mikroqarz summasi, foizlar va boshqa to'lovlar miqdorini to'liq va so'zsiz tan oladi.

6.2. Qarz oluvchi mazkur majburiyatlar mavjudligi hamda ularning miqdori, to'lash muddatlari va hisob-kitob tartibi nizosizligini oldindan tasdiqlaydi.

## VII. SUDSIZ UNDIRISH VA IJRO XATI

7.1. Qarz oluvchi mazkur Shartnoma bo'yicha majburiyatlarini belgilangan muddatlarda to'liq yoki qisman bajarmagan taqdirda, Bank Mikroqarz summasini, foizlar va undirish bilan bog'liq boshqa to'lovlarni sudga murojaat qilmasdan, notariusning ijro xati asosida undirishga haqli.

7.2. Qarz oluvchi mazkur Shartnoma bo'yicha qarz undirilishi uchun notarius tomonidan ijro xati chiqarilishiga oldindan, so'zsiz rozilik beradi hamda bu holda sud tartibida undirish talab qilmasligini tasdiqlaydi.

7.3. Undiruvni garovga qo'yilgan mulkka qaratishda sudga murojaat qilinmasdan, notariusning ijro xati asosida amalga oshiriladi.

7.4. Notariusning ijro xatini yozishi uchun qilingan to'lovlar qarzdor tomonidan qoplanadi.

7.5. Qarzdorlik bazaviy hisoblash miqdorining bir ming baravaridan oshganda Mikroqarz mablag'lari qonunchilikda belgilangan tartibda sud orqali undirilishi mumkin.

## VIII. TA'MINOT

8.1. Qarz oluvchi Shartnoma bo'yicha o'z majburiyatlari bajarilishini ta'minoti sifatida Mikroqarzning individual shartlari (**1-ilova**)da keltirilgan ta'minot turlarini taqdim etadi.

8.2. Ta'minot mol-mulk garovi bo'lganda Qarz oluvchi garov obyektini Bank foydasiga yong'in, zilzila, yo'l transport hodisasi va boshqa sug'urta hodisalaridan Mikroqarz muddatiga mos ravishda sug'urtalaydi.

8.3. Qarz oluvchi garov obyektini sug'urtalaganidan so'ng sug'urta polisini Bankga 1 (bir) ish kuni ichida taqdim etishi shart, sug'urta polisi tegishli sug'urta kompaniyasi tomonidan Bankga onlayn shaklda taqdim etilgan holatlar bundan mustasno.

8.4. Bankning Shartnoma bo'yicha Mikroqarz ajratish majburiyati Mikroqarz qaytarilishining ta'minlanishini belgilovchi hujjat belgilangan tartibda to'liq rasmiylashtirilganidan so'ng kuchga kiradi.

8.5. Mikroqarz hisobiga sotib olinadigan mulk (Kredit obyektini)ni ushbu Mikroqarz bo'yicha garovga taqdim qilish sharti qo'llanilganda mazkur mulk (Kredit obyektini) Qarz oluvchi tomonidan qabul qilib olinganidan so'ng 10 (o'n) ish kunidan kechiktirmasdan garov obyektini sifatida Bankga garovga taqdim etiladi. Agar ushbu muddat davomida garovga qo'yilishi belgilangan mulk(lar) garovga qo'yilmasa Qarz oluvchi Mikroqarz foizi miqdorini **2 (ikki) foiz yuqori** oshirilgan miqdorda to'lash majburiyatini oladi. Mazkur talab doirasida garov mulki taqdim etilishi bilan Mikroqarzga dastlabki belgilangan miqdorlarda foiz hisoblanadi.

8.6. Qarz oluvchining mikroqarz bo'yicha moddiy javobgarligi Mikroqarzning individual shartlari (**1-ilova**)da ko'rsatilgan ta'minot bilan cheklanmaydi.

8.7. Qarz oluvchi Shartnomada ko'rsatilgan majburiyatlarning bajarilishi ta'minotini taqdim etmaguncha Bank kredit hisobvarag'i ochmasligi yoki mikroqarz

bo'yicha pul o'tkazish to'g'risidagi to'lov hujjatlarini (arizani) ijroga qabul qilmasligi, qabul qilingan to'lov hujjatlarini (arizalarni) ijrosiz qaytarishi mumkin.

8.8. Mikroqarz ta'minoti hujjatlarini rasmiylashtirish bilan bog'liq bo'lgan xarajatlar, shuningdek garov (ipoteka) shartnomasini notarial tasdiqlash, davlat ro'yxatidan o'tkazish, ipoteka to'g'risidagi qayd yozuviga o'zgartirish va qo'shimchalar kiritish bilan bog'liq xarajatlarni Qarz oluvchi to'laydi.

8.9. Qarz oluvchi ta'minotga taqdim etilgan obyektlarni (mol-mulkni, mulkiy huquqlarni, huquqlarni) Mikroqarz va uning foizlari to'liq to'languncha Bankning rozilgisiz sotishga yoki boshqacha tarzda realizatsiya qilishga haqli emas.

8.10. Mikroqarz ta'minoti sifatida garovga qo'yilgan mulkka shikast yetkazilganda yoki turli sabablarga ko'ra yaroqsiz holga kelib qolganda Qarz oluvchi 10 (o'n) ish kuni ichida Mikroqarz ta'minotiga qo'shimcha ravishda likvidli mol-mulk, kafillik yoki qonunchilikda belgilangan boshqa ta'minot turini taqdim etadi.

8.11. Mikroqarz ta'minoti sifatida kafilligi qabul qilingan jismoniy shaxs(lar) to'lov qobiliyatini yo'qotgan hollarda (masalan: ishsiz qolganda, vafot etganda, turli sabablarga ko'ra mehnatga layoqatsiz bo'lib qolganda) Qarz oluvchi 10 (o'n) ish kuni ichida mikroqarz ta'minotiga qo'shimcha ravishda likvidli mol-mulk, kafillik yoki qonunchilikda belgilangan boshqa ta'minot turini taqdim etadi.

## **IX. MONITORING**

9.1. Bank bevosita qarz oluvchining yashash joyida va doimiy ro'yxatdan o'tgan joyida Mikroqarzning maqsadli ishlatilishi yuzasidan tekshirishlarni amalga oshirishi mumkin, Mikroqarz mablag'i maqsadsiz ajratilgan holatlar bundan mustasno. (Mikroqarz maqsadsiz ajratilgan hollarda mikroqarzning maqsadli ishlatilishi o'rganilmaydi).

9.2. Quyidagi hollarda Mikroqarz maqsadsiz sarflangan yoki maqsadsiz foydalanilgan deb hisoblaniladi (Mikroqarz mablag'i maqsadsiz ajratilgan holatlar bundan mustasno):

9.2.1. Mikroqarz mablag'i hisobiga sotib olinishi lozim bo'lgan tovar (ish, xizmat) oldi-sotdi (ish, xizmat ko'rsatish) shartnomasida belgilangan muddatda Qarz oluvchi tomonidan qabul qilib olinmaganda (Qarz oluvchiga yetkazib berilmaganda);

9.2.2. Qarz oluvchi Mikroqarz ajratilganidan so'ng Bank xodimlariga Mikroqarz monitoringini o'tkazilishida to'sqinlik qilsa yoki sharoit yaratib bermasa;

9.2.3. Mikroqarz rasmiylashtirilayotganda Qarz oluvchi tomonidan Bankga taqdim etilgan ma'lumotlar haqqoniy emasligi aniqlanganda;

9.2.4. O'tkaziladigan monitoring natijalariga ko'ra Mikroqarz maqsadsiz sarflangan yoki maqsadsiz foydalanilgan deb topilsa;

9.2.5. Mikroqarz hisobiga sotib olingan mulkni Bankning yozma rozilgisiz sotilishi, xadya qilinishi, almashtirilishi yoki boshqa yo'l bilan chetlatilishiga yo'l qo'yilgan bo'lsa.

9.3. Bank bevosita Qarz oluvchining yoki garov mulki egasining yashash joyida yoki doimiy ro'yxatdan o'tgan joyida yoki garov obyekti joylashgan manzilda garov mulki holatini o'rganish yuzasidan tekshirishlarni amalga oshirishi mumkin.

9.4. Mikroqarz ta'minoti sifatida garovda turgan mulkni Bankning yozma rozilgisiz sotilishi, xadya qilinishi, almashtirilishi yoki boshqa yo'l bilan chetlatilishi mumkin emas.

9.5. Bank Shartnoma bo'yicha zarur bo'lgan hujjatlarni Qarz oluvchidan so'rab olishi va ushbu hujjatlar to'liq taqdim qilinmaganda mikroqarz mablag'larini ajratishni to'xtatib turishi mumkin.

9.6. Qarz oluvchining daromad manbalariga nisbatan shubha uyg'onganida yoki Mikroqarzni qaytarilishi muammoga aylanganida Bank vakillari Qarz oluvchining ish joyiga borib yoki boshqa usullar orqali uning haqiqatan ishlayotganligi va oylik daromadlari to'g'risida ish joyidan tasdiqlangan ma'lumotnoma olishi mumkin.

9.7. Qarz oluvchiga nisbatan huquqni muhofaza qiluvchi organlar, nazorat qiluvchi organlar yohud sudlar tomonidan qo'llanilgan yoki qo'llanilayotgan huquqiy ta'sir choralari, iqtisodiy, moliyaviy jarimalar va iqtisodiy, moliyaviy sanksiyalar to'g'risida Bankga 2 (ikki) ish kuni ichida xabar beradi.

## **X. MAJBURIYATLARNI BAJARMASLIK HOLATLARI**

10.1. Quyidagi hodisalarning har biri majburiyatlarning bajarilmasligi holati hisoblanadi:

10.1.1. Mazkur Mikroqarz ofertasida va ofertaning ajralmas qismi hisoblangan jadvalda belgilangan muddatlarda mikroqarz, foizlar va/yoki boshqa to'lovlar amalga oshirilmaganligi;

10.1.2. Qarz oluvchi tomonidan Ariza taqdim qilish yoki Mikroqarzni rasmiylashtirish jarayonida qasddan bila turib haqiqatga to'g'ri kelmaydigan va haqqoniy bo'lmagan ma'lumotlarni bergan holda Bankni chalg'itish;

10.1.3. Bankning xulosasiga ko'ra, mikroqarz bo'yicha Qarz oluvchi tomonidan Bankka taqdim etilgan ta'minotning qisman yoki to'liq o'z qiymati (kuchi)ni yo'qotganligi;

10.1.4. Qarz oluvchining to'lovga qodirligi yomonlashganligi yoki Shartnoma bo'yicha majburiyatlarning muntazam ravishda bajarilmasligiga olib keladigan aniq axborotning yashirilishi;

10.1.5. Qarz oluvchining Bank oldidagi majburiyatlarining bajarilishiga ta'sir ko'rsatishi mumkin bo'lgan boshqa hodisalar;

10.1.6. Shartnoma shartlarining buzilishi.

## **XI. TARAFLARNING JAVOBGARLIGI**

11.1. Taraflardan biri Shartnoma bo'yicha o'z majburiyatlarini bajarmagan yoki lozim darajada bajarmagan taqdirda, aybdor Taraf ikkinchi Tarafga yetkazilgan zarar qismini qoplaydi va O'zbekiston Respublikasining Fuqarolik Kodeksiga, boshqa amaldagi qonun hujjatlariga va Shartnomaga muvofiq javobgar bo'ladi.

11.2. Qarz oluvchi Shartnomaga asosan Mikroqarzning asosiy qismini qaytarish bo'yicha o'z majburiyatlarini bajarishni kechiktirgan taqdirda O'zbekiston Respublikasi qonunchiligida nazarda tutilgan tartibda javobgarlikka tortiladi va Bankga Shartnoma majburiyatlarni bajarmaganlik yoki lozim darajada yetkazilgan zararni to'liq qoplaydi.

11.3. Qarz oluvchi Shartnomaga asosan Mikroqarz uchun hisoblangan foizlarni qaytarish bo'yicha o'z majburiyatlarini bajarishni kechiktirgan taqdirda O'zbekiston Respublikasi qonunchiligida nazarda tutilgan tartibda javobgarlikka tortiladi va

Shartnomaga asosan hisoblangan foizlarni o'z vaqtida qaytarmaganlik tufayli yetkazilgan zararni qoplash uchun javobgar bo'ladi.

11.4. Qarz oluvchi Shartnoma bo'yicha o'z majburiyatlarini bajarmagan yoki lozim darajada bajarmagan taqdirda neustoykadan tashqari yetkazilgan zararni to'liq miqdorda to'laydi.

11.5. Bank Mikroqarz berish majburiyatini bajarmaganda yoki o'z vaqtida bajarmaganda Qarz oluvchi oldida qonunchilikda belgilangan tartibda javob beradi.

11.6. Taraflar Shartnoma bo'yicha o'z majburiyatlarini bajarmaganligi yoki lozim darajada bajarmaganligi natijasida yetkazilgan zararni qoplash yoki majburiyatni bajarmagan yoki lozim darajada bajarmaganligi uchun hisoblangan neustoykani to'lash majburiyatni asl holida bajarishdan ozod qilmaydi.

11.7. Qarz oluvchining telefon raqami o'zgarganligi, ishlamaganligi yoki yangi raqamini Bankka taqdim qilmaganligi sababli Qarz oluvchiga SMS-xabarlar bormaganligi uchun Bank javobgar hisoblanmaydi.

11.8. Qarz oluvchi yoki u bilan munosabatga kirishgan shaxs hatti-harakatlari yuzasidan tegishli tashkilotlar tomonidan Qarz oluvchiga yoki u bilan munosabatga kirishgan shaxsga qo'llanilgan har qanday choralar, jumladan sanksiyalar (tegishli ro'yxatlar, OFAC, Yevropa Ittifoqining Mar va OFSI, SDN va CARTA sanksiyalari) shuningdek, sanksiyalar oqibatida vujudga keladigan har qanday turdagi zararlar uchun Bank o'z majburiyatlarini bajarganligi yoki lozim darajada bajarmaganligidan qat'iy nazar javobgar hisoblanmaydi.

11.9. Qarz oluvchining telefon raqami o'zgarganligi, ishlamaganligi yoki yangi raqamini Bankka taqdim qilmaganligi sababli Qarz oluvchiga SMS-xabarlar bormaganligi uchun Bank javobgar hisoblanmaydi.

## **XII. NIZOLARNI HAL ETISH**

12.1. Shartnoma shartlarini bajarish jarayonida vujudga keladigan kelishmovchiliklar Taraflar o'rtasida muzokaralar yo'li bilan hal etiladi.

12.2. Taraflar kelishuvga erishmagan taqdirda va/yoki Qarz oluvchi nizoni sudgacha hal qilish yuzasidan talabnomada belgilangan muddatda ko'rsatilgan talablarni lozim darajada bajarmaganda, nizo O'zbekiston Respublikasining amaldagi qonun hujjatlariga muvofiq sudda ko'rib chiqiladi.

## **XIII. SHARTNOMANING AMAL QILISH MUDDATI**

13.1. Shartnoma Qarz oluvchi tomonidan akseptlangan kundan boshlab kuchga kiradi.

13.2. Shartnoma Taraflar o'z majburiyatlarini to'liq bajargunga qadar amal qiladi.

13.3. Qarz oluvchi "Jinoiy faoliyatdan olingan daromadlarni legallashtirishga, terrorizmni moliyalashtirishga va ommaviy qirg'in qurolini tarqatishni moliyalashtirishga qarshi kurashish to'g'risida"gi Qonun talablariga hamda boshqa amaldagi qonun, qonun osti hujjatlariga rioya qilmaganda shartnoma bir tarafdama Bank tomonidan bekor qilinadi

## **XIV. ANTIKORRUPSIYAGA OID SHARTLAR**

14.1. Taraflar, ularning affillangan shaxslari, xodimlari yoki boshqa ishtirokchilari ushbu Shartnoma shartlarini bajarishda ikkinchi tomonning qaror qabul qilishiga ta'sir o'tkazish maqsadida bevosita yoki bilvosita pul mablag'lari qimmatliklar yoki xizmatlar taklif qilishi, berishi, taqdim etishi ta'qiqlanadi.

14.2. Taraflar, ularning affillangan shaxslari, xodimlari yoki boshqa ishtirokchilari ushbu Shartnoma shartlarini bajarishda qaror qabul qilishiga ta'sir o'tkazish maqsadida shartnomaning boshqa ishtirokchilari tomonidan bevosita yoki bilvosita pul mablag'lari, qimmatliklar yoki xizmatlar taqdim etish bo'yicha taklifini rad qilishi lozim.

14.3. Agar shartnoma Taraflarida ushbu shartnoma shartlarini bajarish bilan bog'liq korrupsion harakat sodir etilganligi to'g'risida ma'lumot, shubha, shubhaga asos bo'luvchi dalilga ega bo'lsa, bu to'g'risida ikkinchi Tarafga bunday harakat sodir bo'lgan kundan boshlab 5 (besh) ish kuni ichida yozma shaklda (yoki Bankning Komplayens nazorat boshqarmasi rahbariga yoki Hududiy kompleks xizmatlar ko'rsatish markazi direktoriga aloqa kanallari yordamida) xabar berish majburiyatini oladi.

14.4. Xabarni olgan Taraf haqiqatan korrupsion harakat sodir etilmaganligini yoki sodir etilmasligi to'g'risida tasdiqqa ega bo'lguncha ushbu shartnoma bo'yicha o'z majburiyatlarini bajarishni to'xtatib turish huquqiga ega.

14.5. Ushbu bo'lim qoidalari Taraflardan biri tomonidan buzilganligi fakti tasdiqlanganda va/yoki boshqa Taraf qoidabuzarliklarni ko'rib chiqish haqida xabarnoma natijalari yuzasidan ma'lumot taqdim qilmagan taqdirda, boshqa Taraf Shartnomani bir tarafdama qisman yoki to'liq bekor qilishga haqli.

14.6. Pora berish evaziga ikkinchi Taraf vakilini, affillangan shaxsini, xodimini Shartnoma shartlarini bajarishda o'ziga og'dirib olgan Taraf ikkinchi Tarafga yetkazilgan zararni qoplab berish majburiyatini oladi.

## **XV. YAKUNIY SHARTLAR**

15.1. Shartnoma elektron tarzda tuzilib, Qarz oluvchi tomonidan Mikroqarz ofertasini akseptlash orqali tasdiqlanadi va yozma kurinishidagi hujjatning yuridik kuchiga ega bo'ladi.

15.2. Shartnoma bo'yicha Taraflarning tartibga solinmagan munosabatlari O'zbekiston Respublikasining amaldagi qonun hujjatlariga muvofiq tartibga solinadi.

15.3. Taraflar o'rtasidagi xat-xabarlar quyidagi aloqa kanallari orqali amalga oshirilishi mumkin: Qarz oluvchining Bankka ma'lum bo'lgan manzillariga (rekvizitlariga) yozma shaklda jo'natish yoki Qarz oluvchining elektron pochtaga, telefon raqamlariga, ijtimoiy tarmoqlardagi akkauntlariga xabar jo'natish yoki masofaviy xizmat ko'rsatish tizimlari orqali elektron xabar jo'natish.

15.4. Qarz oluvchi amalga oshirilgan to'lovlar va Mikroqarz qarzdorligi miqdori (asosiy qarz, foiz, oshirilgan foiz qarzdorligi va muddati o'tgan qarzdorliklar) haqida, shuningdek Shartnoma bilan bog'liq boshqa holatlar bo'yicha uyali aloqa vositalari orqali SMS-xabarlar yuborilishiga Bankka o'z roziligini bildiradi.

## **XVI. BANK MANZILI VA REKVIZITLARI**

**AT "Aloqabank"**

**Manzil:** \_\_\_\_\_

**MFO:** \_\_\_\_\_

**STIR:** \_\_\_\_\_

**Tel:** \_\_\_\_\_

**XVII. QARZ OLUVCHI MANZILI VA REKVIZITLARI**

**F.I.Sh.:** \_\_\_\_\_

**Manzil:** \_\_\_\_\_

**Pasport ma'lumotlari:** \_\_\_\_\_

**JShShIR:** \_\_\_\_\_

**Aksept kodi:** \_\_\_\_\_

**Aksept vaqti:** \_\_\_\_\_

**Telefon raqami:** \_\_\_\_\_



**MIKROQARZNING INDIVIDUAL SHARTLARI**

**Mikroqarzning to'liq qiymati**  
 \_\_\_\_\_ ( \_\_\_\_\_ ) foiz  
*(miqdori) (so'z bilan)*

Mikroqarz miqdori: \_\_\_\_\_ ( \_\_\_\_\_ ) so'm.  
*(summa) (summa so'z bilan)*

Mikroqarz muddati: \_\_\_\_\_ ( \_\_\_\_\_ ) oy.  
*(muddat) (so'z bilan)*

Mikroqarzni so'ndirishning oxirgi muddati: \_\_\_\_\_.\_\_\_\_\_.\_\_\_\_\_ yil.  
*(sana)*

Mikroqarz valyutasi: **O'zbekiston Respublikasining milliy valyutasi;**

Mikroqarz bo'yicha foiz stavkasi: Yillik \_\_\_\_\_ ( \_\_\_\_\_ ) foiz.  
*(miqdori) (miqdor so'z bilan)*

Mikroqarzning muddati o'tgan asosiy qismi uchun oshirilgan foiz stavka: \_\_\_\_\_  
 ( \_\_\_\_\_ )  
*(miqdori) (miqdori so'z bilan)*

Mikroqarzdin foydalanganlik uchun foiz stavkasi turi taraflarning kelishuviga ko'ra:  
**o'zgaruvchi/o'zqarmas.**

Mikroqarz bo'yicha to'lovlarni to'lash sanasi: har oyning \_\_\_\_\_ sanasigacha.  
*(sana)*

Mikroqarzni ajratish shakli: **[Maqsadsiz ajratilgan hollarda]** Qarz oluvchining nomiga emissiya qilingan xxxx xxxx xxxx xxxx raqamli bank kartasiga o'tkazib berish yo'li  
*(karta raqami)*

orqali. **[Avtokredit uchun ajratilgan hollarda]** Oldi-sotdi (ish, xizmat ko'rsatish) shartnomasiga asosan naqdsiz pul ko'chirish yo'li bilan.

Mikroqarzni qaytarish usuli: Shartnomaga ilova qilingan **differensial/annuitet** usulda hisoblangan to'lov grafigiga muvofiq.

Mikroqarz maqsadi: Maqsadsiz. **[Maqsadsiz ajratilgan hollarda]** / \_\_\_\_\_  
*(Avtomashina nomi)*

avtomashinasini sotib olish uchun. **[Avtokredit uchun ajratilgan hollarda]**

Mikroqarz ta'minoti: **[Avtokredit sifatida rasmiylashtirilganda]** Mikroqarz hisobiga sotib olinadigan \_\_\_\_\_ avtomashinasi, ushbu avtomashina garovga  
*(Avtomashina nomi)*

taqdim qilingunga qadar \_\_\_\_\_ ning kreditning qaytmaslik xataridan sug'urta  
*(sug'urta kompaniyasi nomi)*

polisi **[va \_\_\_\_\_ ning to'liq kafilligi].**  
*(Kafilning F.I.Sh. – kafil bor bo'lsa chiqadi)*

**[Boshqa turdagi mikroqarzlarda]** \_\_\_\_\_ / \_\_\_\_\_  
*(Garov mulki nomi) (sug'urta kompaniyasi nomi)*

ning kreditning qaytmaslik xataridan sug'urta polisi / \_\_\_\_\_  
**[va \_\_\_\_\_ ning to'liq kafilligi].** *(Kafilning F.I.Sh. – kafil bor bo'lsa chiqadi)*

Mikroqarzning to'liq qiymati \_\_\_\_\_ ( \_\_\_\_\_ ) foizni tashkil qiladi  
(miqdori) (miqdor so'z bilan)

va u quyidagi to'lovlarni hisobga olib hisoblanadi:

a) Mikroqarzning asosiy qarzi – \_\_\_\_\_ ( \_\_\_\_\_ ) so'm, \_\_\_\_ tiyin;  
(summa) (summa so'z bilan)

b) Foizlar bo'yicha to'lovlar – \_\_\_\_\_ ( \_\_\_\_\_ ) so'm, \_\_\_\_ tiyin;  
(summa) (summa so'z bilan)

c) Sug'urta to'lovlari – \_\_\_\_\_ ( \_\_\_\_\_ ) so'm, \_\_\_\_ tiyin;  
(summa) (summa so'z bilan)

d) Garov mulkini baholash bo'yicha to'lovlar – \_\_\_\_\_ ( \_\_\_\_\_ ) so'm, \_\_\_\_ tiyin;  
(summa) (summa so'z bilan)

e) Adliya vazirligida 2018-yil 2-iyulda 3030-son bilan ro'yxatga olingan "Bank xizmatlari iste'molchilari bilan o'zaro munosabatlarni amalga oshirishda tijorat banklarining faoliyatiga qo'yiladigan minimal talablar to'g'risida"gi Nizomning 1-ilovasiga asosan boshqa to'lovlar – \_\_\_\_\_ ( \_\_\_\_\_ ) so'm, \_\_\_\_ tiyin.  
(summa) (summa so'z bilan)

**F.I.Sh.:** \_\_\_\_\_

**Manzil:** \_\_\_\_\_

**Pasport ma'lumotlari:** \_\_\_\_\_

**JShShIR:** \_\_\_\_\_

**Aksept kodi:** \_\_\_\_\_

**Aksept vaqti:** \_\_\_\_\_

**Telefon raqami:** \_\_\_\_\_



**MIKROQARZNI QAYTARISH GRAFIGI (Namuna)**

Ushbu mikroqarzni qaytarish javdali ofertaning ajralmas qismi hisoblanadi.

Mikroqarz summasi **5 000 000 UZS**  
 Mikroqarz yillik foizi **26,00%**  
 Mikroqarz muddati (oy) **12**  
 Imtiyozli davr (oy) **0**

MFO: **00401**  
 To'lov ID kodi: **xxxxxxxxxxx**

T/r	To'lov sanasi	Mikroqarz qoldig'i summasi	Asosiy qarzni qaytarish	Mikroqarz foizi	Bir oylik jami to'lov
				26%	
1	15.03.2024	5 000 000,0	416 666,7	103 287,7	519 954,3
2	15.04.2024	4 583 333,3	416 666,7	101 210,0	517 876,7
3	15.05.2024	4 166 666,7	416 666,7	89 041,1	505 707,8
4	15.06.2024	3 750 000,0	416 666,7	82 808,2	499 474,9
5	15.07.2024	3 333 333,3	416 666,7	71 232,9	487 899,5
6	15.08.2024	2 916 666,7	416 666,7	64 406,4	481 073,1
7	15.09.2024	2 500 000,0	416 666,7	55 205,5	471 872,1
8	15.10.2024	2 083 333,3	416 666,7	44 520,5	461 187,2
9	15.11.2024	1 666 666,7	416 666,7	36 803,7	453 470,3
10	15.12.2024	1 250 000,0	416 666,7	26 712,3	443 379,0
11	15.01.2025	833 333,3	416 666,7	18 401,8	435 068,5
12	15.02.2025	416 666,7	416 666,7	9 200,9	425 867,6
<b>JAMI:</b>			<b>5 000 000,0</b>	<b>702 831,1</b>	<b>5 702 831,1</b>

**F.I.Sh.:** \_\_\_\_\_

**Manzil:** \_\_\_\_\_

**Pasport ma'lumotlari:** \_\_\_\_\_

**JShShIR:** \_\_\_\_\_

**Aksept kodi:** \_\_\_\_\_

**Aksept vaqti:** \_\_\_\_\_

**Telefon raqami:** \_\_\_\_\_

